

burgk, an andern tail, als hienach geschriben stet: Zum ersten, das die benannten herren Ire guter, die Si an einander verkauft haben, nach lautt Ir brief, die si enandir gegeben haben, jeklich teil die guter selber, wie sy die enander verkauft haben, furder mehr enander nyme gewerin durffen noch sullen; So sol der benant her Hlawaksch hern Wentzsche die brief antwurten vnd geben, die her von hern Jone von Dohnyn hat, vnd den kaiserlichen brief, der Im uber die Herschaft Grefenstein gegeben ist, vnd sol Im denne vort zwischen sant Michelstag gezeugnuß brief von den Burgen, die her verkauft hat vor solch gelt, damit die Herschaft Grefenstein an Im komen ist mit willen vnser gnedigisten herren des kaisers seligen, von hern Sigmunde von Tezschen vnd von hern Jone von Dohnyn, dem rechten Erben, vnd von dem Myßperg, der denn ein bot gewest ist zu landen vnd Stete in einer werbung, ein hulffe zu tun von vnser gnedigisten herren des kaisers wegen, antwurten vnd geben her gen Budissin mir, Thimen von Colditz; Dofegin sol der benant her Wentzsch den kaufbrief, den her vber kunigsburgk von Hannsen von Polentz seligen hat, vnd den lehenbrief von mir, Thymen, vnd den brief, den her hat von den alden Foltzsche von Torgaw, dem got gnad; antwurten vnd inlegen gen Gorliz Hinz kotwize, Hauptmann zu Gorliz; vnd das sol geschehen, die brief Inlegung, von iklicher partheien Inwendig virgehen tagen, des ich, benanter Thime, vñlicher parteien Ire brief denn antwurten sol, als sich geboret vnd geteidingt ist vngewerlichen. So haben wir dann vort geteidinget, Welch teil an erben abginge von todswegen vnd vnverscholte guter hinder Im liesse, das sol an das ander tail komen vnd gefallen vngewerlich; Welde denn dieselbe parteie, die do lebendig bleben, die verscholten guter haben, das sol Si von den [an sich?] brengen, nachdem als Si das brief vnd Sigl vnd wissenschafft haben daruber, die das Innehaben. Damit so sint allerlei schelunge, vnwille, zwitragt, wie sich die zwischen den genannten hern vorlauffen haben baß her, abgeton vnd hingelegt, ganz entschaiden vnd gericht, furder nymmer mehr zugedenkchen, widir vmbe gewere, noch vmb keinerlei sachen. Diser betedung, sachen vnd richtung sint mit gezeug die gestrengen Hanns Jode zu Reichenbach, Hanns von Lutchen zu Weisbach [Weißbach], Balzer von Schonesfeld zu Newtkirche gefessen, vnd ander vil guter leut, die dabei gewest sint. Des zu warem Bekentnuß vnd grosser sicherhait haben wir obin genannte tedings leuthe vnser vñlicher sein aigen Insigl an diesen offen brief lassen hengen.

Vnd haben des zu worem bekentnuß vnd merer sicherhait vnser Capitls Sigl mit gutem willen vnd wissen an disen brief lassen hongen. Geben vnd geschriben nach kristi gepurd virgehen hundert darnach in dem zway vnd funfzigisten Jare am abend aller Heiligen tag.

Also haben wir durch vleissiger pet willen vnd von sundern gnaden dasselb Vidimus vnd den Hauptbrief mit allen seinen puncten, stucken vnd artikeln, dar Im begriffen, bestett [bestätigt] vnd bestetten auch wissentlich mit dem brief, was wir zu Recht daran bestetten sullen oder mugen; mainen vnd wellen, das derselb Hauptbrief in allen seinen punten, als vorstet, bei kresten beleiben vnd gehalten werden sullen, an alle Irrung angeuerd. Mit Urkund des briefs. Geben zu Wienn an sant Lucientag, Nach kristi gepurd virgehenhundert vnd im Zwayvndfunfzigistem. Vnserr krönung, Vnsers Reichs des Hungrischen zc. im dreizehenden Jare."

